

ՀԱՅ-ԲՅՈՒՋԱՆԴԱԿԱՆ ՀԱՐԱՔԵՐՈՒԹՅՈՒՆՆԵՐԸ VII ԳԱՐՈՒՄ՝
ԱՐՍԲԱԿԱՆ ԱՌԱՋԻՆ ԱՐՇԱՎԱՆՔՆԵՐԻ ԺԱՄԱՆԱԿ՝

Հ. Կ. ԻՍԿԱՆՅԱՆ

VII դարում արաբական արշավանքները քաղաքական լուրջ փոփոխություններ են մտցնում Մերձավոր Արևելքում. ջախջախված Սասանյան պետությունը դադարում է գոյություն ունենալուց: Բյուզանդական կայսրությունը զրկվում է իր արևելյան գրեթե բոլոր նահանգներից, իսկ նրա մայրաքաղաք Կոստանդնուպոլիսն ընկնում է արաբների կողմից գրավվելու վերահաս սպառնալիքի տակ: Հայաստանն ավելի քան կէս դար շարունակ դառնում է արաբ-բյուզանդական ռազմական արյունահեղ ընդհարումների ասպարեզ: Հայ ժողովուրդը, ավատվելով պարսկական տիրապետությունից, կենաց և մահու պայքար է մղում բյուզանդական և արաբական նվաճողների դեմ իր անկախության, ազգային ինքնությունը գոյության պահպանման համար:

Արաբական նվաճումների առաջին շրջանում տեղի են ունեցել վերին աստիճանի կարևոր հայ-բյուզանդական քաղաքական հարաբերություններ, որոնք հսկայական ազդեցություն են թողել ոչ միայն Հայաստանի ու Բյուզանդիայի, այլև, կարելի է ասել, ամբողջ Մերձավոր Արևելքի տվյալ ժամանակի պատմական իրադարձությունների վրա: Սույն հոդվածը այդ հարաբերությունների ուսումնասիրման մի փորձ է:

ՇՈՂ-628 թթ. պարսկա-բյուզանդական պատերազմն ավարտվում է կայսրության հաղթանակով: 628 թ. կնքված հաշտության պայմանագրով արևելքում վերահաստատվում է 591 թ. սահմանագիծը, որը, ինչպես հայտնի է, անցնում էր Տփղիս (Թբիլիսի) — Թուրքի (Թրիալեթի) լեռներ — Խոնավ լեռներ — Բազումի լեռներ — Գեղամա լեռներ — Ազատ դետ — Մակե — Առևստավան — Ընծաքիարս լեռ — Մծբին ուղղությամբ¹: Հայաստանի մեծ մասը՝ ՉՅ-ը, նորից մնում է կայսրությանը, որը, սակայն, ի վիճակի չէր ավաշտպանելու երկիրը արևելյան սահմաններում հսկողնված նոր նվաճողներից՝ արաբներից:

Բյուզանդիայի և Պարսկաստանի միջև մղված երկարատև պատերազմների, նրանց անցկացրած հարկային, զինվորական, վարչական և այլ միջոցառումների հետևանքով խիստ նվազել էր Հայաստանի պաշտպանունակությունը: Բյուզանդիան և Պարսկաստանը, որոնք թուլացել էին ներքուստ, զինվորական տնտեսական ուժեր չունեին Հայաստանում: Վերջինիս պաշտպանությունը իրականում թողնված էր բախտի քմահաճությանը: Չէին դադարում ֆեոդալական երկպառակությունները: Կայուն չէր երկրի կառավարումը թե՛ արևմտյան, և թե՛ արևելյան մասում:

* Հանդուցյալ հայագետ Վ. Իսկանյանի այս հոդվածը, որ նրա մեծ աշխատության մի հատվածն է, տպագրության է պատրաստել Ա. Տեր-Ղևոնդյանը:

¹ Տե՛ս «Атлас истории СССР», часть I. М., 1948: Հմմտ. Թ. Հակոբյան, Ուղղվածքը Հայաստանի պատմական աշխարհագրության, Երևան, 1960, էջ 114:

Հայաստանի Արևելյան կամ Մարդպանական մասում, որի կենտրոնը Դվինն էր, կառավարում էր Կավատ Բ-ի կողմից նշանակված վերջին մարդպան՝ Վարադտիրոց Բագրատունին (628—633)՝ Զավիտյան-Խոսրով մականունով, նշանավոր զորավար Սմբատ Շումի որդին։ Վարադտիրոցը Սերևոս պատմիչի մոտ հռոմիս հիշատակվում է նաև «ասպետ» բառով՝ նա իր կառավարման ժամանակ, շնայած Պարսկաստանում տեղի ունեցող խռովություններին, զրադվում է խաղաղ շինարարական աշխատանքով. «Սինեաց բոլորովին զամենայն աշխարհն Հայոց», — վկայում է ժամանակակից Սերևոսը՝ Սակայն շուտով խախտվում է խաղաղությունը երկրում։ Վարադտիրոցը հրաժարվում է ենթարկվել Ատրպատականի կառավարիչ, ազդեցիկ իշխան Խոռոխ-Որմիղդին և նրա որդի ու հաջորդ Ռոստոմին, որը պատերազմներում անուն հանած զորավար էր։ Հայաստանի բյուզանդական կառավարիչ Մժեժ Գնունին, օգտվելով հանգամանքից, չարախոսում է մարդպանի հասցեին Ռոստոմի առաջ և ալիլի սրու՝ թշնամանքը նրանց միջև։ «Մի կացցէ սա ի Հայս. ապա թէ ոչ խռովութիւն մեծ լինիցի ի մէջ երկոցունց թագաւորացն»⁴, — ասում է Մժեժ Գնունին Ռոստոմին։ Խոռոխ-Որմիղդն իր Գարիքսկո Լեդոբը բազմակրում է Դվին ձմեռելու և մարդպանին ձերբակալելու համար։ Բայց Վարադտիրոցն իրեն համակրող անվանի պարսիկներից լուր ստանալով դավադրության մասին, ընտանիքով փախչում է Տարոն, զորք է հավաքագրում և դիմում Հերակլ I կայսեր (610—641) օգնությանը՝ խնդրելով իրեն ապաստան տալ Բյուզանդիայում։

Պարսիկների դավադրությունը, ինչպես գտնում են, սոսկ առիթ էր 633 թ. Վարադտիրոցի Բյուզանդիա կատարած փախուստի համար։ Իրականում Պարսկաստանի թուլացումը և կայսրության ուժեղացումը՝ Հերակլի օրոք, ստիպում է նրան ընտրելու բյուզանդական կողմնորոշումը⁵։

Հերակլ I-ը հանդիսավորապես ընդունում է Վարադտիրոցին «յԱսորեստանիսց աշխարհին», խոստանում է անձեռնմխելի թողնել նրա կյանքը, որոշ ժամանակ պահել իր մոտ, ապա ուղարկել Հայաստան։ Կայսրը Վարադտիրոցին արժանացնում է բյուզանդական պատրիկներից առավել բարձր մեծարանքի, իսկ անուհիներն անվանվում են Պրլիս «ևս նմա ապարանս թագաւորականս և գահոյս արծաթիս և գանձս բազումս յոյժ»։ Նրա որդին շուտով դառնում է կայսեր սենեկասյանի սիրուլին⁶։

Վարադտիրոցի և որդու առաջ բացվում են լայն հեռանկարներ բյուզանդական ծառայության մեջ առավել բարձր դիրքի հասնելու համար, բայց հետագա անսպասելի իրադարձությունները խորտակում են նրանց այդ հույսերը։

Հերակլ I-ի որդին՝ Աթալարիկոսը, գահին տիրելու համար հոր դեմ դա-

² Այս հայ իշխանն անվանվել է նաև Վարադ Սահակ (Ed. Dulaurier, Recherches sur la chronologie arménienne, Paris, 1858, էջ 358)։

³ Սերևոս, Պատմութիւն, Երևան, 1939, էջ 102։

⁴ Նույն տեղում։

⁵ Բ. Առաքելյան, Հայաստանը արաբական տիրապետության առաջին շրջանում և հայերի պայքարն անկախության համար (Վրացական մոնոգրաֆիա, ՍՍՀՄ գիտ. ակադ. հայկ. ֆիլիալի՝ նվիրված Հայաստանում սովետ. իշխ. հաստատման 20-ամյակին, Երևան, 1941), էջ 66։ Կ. Բամադջյանը Վարադտիրոցի մարդպանության վերջին տարին, հետևաբար նրա անցումը կայսրության կողմը դնում է 634 թ. (տե՛ս «Ժամանակագրական պատմություն հայոց», «Ամենուն Տարեցույց», Կ. Պոլիս, 1914)։

⁶ Սերևոս, էջ 103։

վաղություն է կաղմակերպում, մասնակից դարձնելով կայսեր եղբորորդուն՝ Թեոդորոս Մագիստրոսին, Վահան խոռխուռունուն և քաղաքի մեծամեծներից շատերին։ Նրանց, մեղ անհայտ պատճառներով, միանում է նուև Վարադտիրոսը, բայց դավադիրների խորհրդակցության ժամանակ, որտեղ որոշվում է կալուսկեռայել հեղաշրջումը, նա հրաժարվում է կայսեր և նրա որդիների սպանությունից⁷։ Խորհրդակցությանը ներկա կուրատորներից⁸ մեկի մատնությամբ ի վերջո դավադրությունը բացվում է և բոլորը ձերբակալվելով պատժվում են։ Հերակլ I-ի հրամանով կտրում են դավադրության մասնակիցների քիթը և աջ ձեռքը։ Բացառություն է կաղմում միայն Վարադտիրոսը⁹։

Կայսրը հրաժարվում է կատարել Վարադտիրոսին մահապատժի ենթարկելու նրա հակառակորդների պահանջը և հրամայում է նրան կնոջ ու որդիների հետ արքային «ի կղզի և ի քաղաքն նեղութեանն»¹⁰ (634 թ.)։ Վարադտիրոսը, ինչպես ենթադրում են, Հերակլի կողմից մեկուսացվել է հավանաբար Աֆրիկայի ափերին մոտ գտնված մի կղզում 635 թ.¹¹։

Այժմ Բյուզանդիայի տիրապետության տակ գտնված Հայաստանում տիրող դրության մասին Արևմտյան Հայաստանը, բրի կենտրոնը Թեոդոսուպոլիս (Կարին) քաղաքն էր, կառավարում էին կայսեր կողմից նշանակված կառավարիչները պատրիկ և կյուրոպաղատ աստիճաններով¹²։ Պարսկա-բյուզանդական պայմանագրից հետո նրա կառավարիչն էր ղորավար Մժեժ Դնունին (629—635), որը «եկն...ի Հայաստան հրկրէն, և յինքն կալաւ դամենայն երկիրն ըստ ասացելումն սահմանին»¹³։ Այս վկայությունից պետք է հետևենք, որ նա է կենսագործել պայմանագրի կետերը, ընդունել սահմանագիծը և ստանձնել երկրի կառավարումը։ Նա աչքի է ընկնում հայ ղինվորական և քաղաքական գործիչների հանդեպ ունեցած թշնամանքով և բյուզանդական արքունիքի նկատմամբ իր անսահման նվիրվածությամբ։ Մժեժ Դնունին դաժան հալածանքի է ենթարկում կայսրության թշնամի ներքին ուժերին, և ընդհանրապես, չնայած հայ լիներուն, ամեն կերպ երկր՝ ու ժողովրդի շահերը զոհաբերել է Բյուզանդիայի շահերին։ Անցնելով իր պաշտոնին, ամեն գնով ձգտել է կատարել Հերակլ կայսեր կամքը՝ իրագործել հայ-բյուզանդական եկեղեցական միաբանությունը՝ հայերի դավանական ձուլումը հույների հետ։

Հերակլը պարսիկներից ձեռք բերած «խաչափայտը» մեծ հանդիսավորությամբ վերադարձնելով Երուսաղեմ (631 թ. սեպտեմբերի 14-ին), անցնում է

⁷ Նույն տեղում, էջ 103։

⁸ Կուրատոր կամ կորատոր (լատ. cura—հոգ, հոգատարություն բառից, որ նշանակում է հոգաբարձու) պաշտոնյան Բյուզանդիայում տնօրինել է ցորեն մթերելու, հողաբաշխման, ջրամուղները հսկելու և այլ գործեր։

⁹ Ս ե բ ո ս, էջ 103—104։

¹⁰ Նույն տեղում։

¹¹ R. Grousset, Histoire de l'Arménie des origines à 1071, Paris, 1947, էջ 286։

¹² Կյուրոպաղատը բյուզանդական բարձր աստիճան էր, որը տրվում էր Արևմտյան Հայաստանի քաղաքացիական կառավարիչ և իր պաշտոնական դիրքով համապատասխանում էր Արևելյան Հայաստանի մարզպանին։ Ա. Տեր-Ղևոնդյանը կազմել է VII դարի հայոց իշխանների հետևյալ տախտակը. Մժեժ Դնունի 629—635, Դավիթ Սահառունի 635—639, Թեոդորոս Ռչտունի 639—654, Համադասյ Մամիկոնյան 654—661, Գրիգոր Մամիկոնյան 661—685, Աշոտ Բագրատունի 685—689, Ներսէ՛ Վամսարական 689—693 (տե՛ս Հայոց իշխան արաբական տիրապետության ժամանակաշրջանում, «Պատմա-բանասիրական հանդես», 1964, № 2)։

¹³ Ս ե բ ո ս, էջ 102։

Սիրիա, ապա մերձևերատյան նահանգների վրայով՝ Արևմտյան Հայաստան, կանգ առնելով Թեոդոսուպոլիս քաղաքում, որը բյուզանդական կուսակալի աթոռանիստն էր։ Այդ ժամանակ կայսրությանը անհանգստացնում էր հարավից սպառնացող արաբական արշավանքի վտանգը։ Անհրաժեշտ էր լեթև ոչ վերացնել, գոնև մեղմացնել սլաշտոնական քաղկեդոնական եկեղեցու և բյուզանդական հպատակ ժողովուրդների եկեղեցիների միջև եղած դավանական վեճերն ու ատելությունը։

Ասորիքի Սերգիոս պատրիարքը (610—638), որ ընդունակ և եռանդուն մարդ էր, այդ նպատակով առաջ է քաշում դավանական նոր ձևակերպում, ըստ որի Փրիստոսի մեջ երկու բնություն կա՝ աստվածային և մարդկային, որոնք բանի որ միացած են մեկ անձի մեջ, ուստի կամքը մեկ է¹⁴։ Այս նոր դավանանքը կոչվում է «մոնոթելիզմ» (միակամություն)։ 626 թ. Կ. Պոլսում դամարված եկեղեցական ժողովը հաստատում է այդ ձևակերպումը։ 634 թ. Սերգիոսը հրապարակում է հայտնի «*Εὐχολογία*»-ը, որով միակամությունը հաստատվում է որպես սլաշտոնական դավանանք։ Կայսեր և պատրիարքի նպատակն էր վերացնել մուսուլմանական վեճերը եկեղեցու մեջ և միաբանություն ստեղծել քաղկեդոնականների և հակաքաղկեդոնականների միջև, ամրապնդել բյուզանդական տիրապետությունը արևելյան նահանգներում, մանավանդ Փոքր Ասիայում, արաբական սպառնացող վտանգի դեմ¹⁵։ Կայսրությունը դավանական նոր ձևակերպումն առաջարկում է իր բոլոր ոչ քաղկեդոնիկ հպատակներին, այդ թվում՝ հայերին, որպես ուղղափառ դավանանք։

Հերակլ I կայսրը, այդպիսով, հայերին և ասորիներին առաջարկում է դավանական միություն ոչ թե քաղկեդոնականության հիման վրա, այլ միակամյա դավանության։ Որը բացարձակ քաղկեդոնականություն չէր, այլ երկու կողմերի մասնակի զիջողությամբ եկեղեցական և քաղկեդոնական դավանությունների միջուսահման մի գրգռություն¹⁶։

Հակաքաղկեդոնականությունը ուժեղ էր Ասորիքում և Հայաստանում։ Հայերն ու ասորիներն ատում էին բյուզանդական լուծը և դավանաբանական տեսակետից, ինչպես գիտենք, քաղկեդոնիկ եկեղեցու անհաշտ թշնամիներն էին։ Այս երկրներում բյուզանդական տիրապետությունն ամուր չէր արտաքին վտանգի դեմ։ Ուստի Հերակլ կայսրը հատուկ ուշադրություն է դարձնում հայերի և ասորիների վրա։ Եզրիպտացիները և ասորիներն ընդունում էին դավանաբանական նոր բանաձևը¹⁷։ Վերջինս անհրաժեշտ էր պարտադրել նաև հայերին։ Սերգիոս պատրիարքը հավանաբար որոշ չափով նախապատրաստել էր այդ խնդրի լուծումը։ 623 թ. Հերակլ կայսրը առաջին անգամ Թեոդոսուպոլսում իր գտնվելու ժամանակ խորհրդակցել էր այսպես կոչված «սևերյան» ուղղամիտ միաբնականների՝ Պավել անունով ներկայացուցչի հետ եկեղեցիների միավորման համար և այդ մասին տեղյակ պահել պատրիարքին։ Պավելը, ինչպես գտնում են, Կիսրոսի հայկական գաղութի առաջնորդն էր, շնայած ուրիշները անհավանական էն համարում այդ նույնացումը, հիմք ընդունելով այն փաստը, որ հայկական եկեղեցին Սևերիանոսին և նրա հետևորդներին հայտարար-

¹⁴ С. Шестаков, Лекции по истории Византии, т. I, Казань, 1915, էջ 355։

¹⁵ Հմտ. G. Ostrogorsky, Histoire de l'Etat Byzantin, Paris, 1956.

¹⁶ Մ. Օրմանյան, Ազգապատում, Կ. Պոլիս, 1912, էջ 687։

¹⁷ Հ. Գեղյան, Համառոտություն բյուզանդական կայսրերի պատմության, Վաղարշապատ, 1901, էջ 120։

րել էր հերետիկոս Գալիլի հետ վարած քանակցությունները հանգում են նրան, որ Հերակլը Կիպրոսի Արկադիոս ևպիսկոպոսի անունով հրապարակում է հրամանագիր՝ դատապարտելով Քրիստոսի մեջ երկու բնության մասին ուսմունքը: Կիպրոսում հայկական զաղութի առկայությունը՝ հիմնված Մորիկի կողմից Արկանեն մարզից վերաբնակեցրած հայերով, հնարավոր է դարձնում ենթադրելու, որ այնտեղ թյուրիմացություններ են տեղի ունեցել ուղղափառ ևպիսկոպոսի և հայերի միջև, որոնք հին կապերը չէին խզել իրենց հայրենիքի հետ¹⁸:

Բյուզանդական դուրավար Մժեժ Գնունին, դառնալով Արևմտյան Հայաստանի սյարապետ, Հերակլի հանձնարարությունները առաջարկում է Եզր Ա Փառաժապետյանի կաթողիկոսին (630—641) անհապաղ ներկայանալ կայսրին և կեղեցական միություն հաստատելու համար: Այդ պահանջը հիմնավորվում է նրանով, որ Հայաստանի եկեղեցին նորից միավորվել էր կաթողիկոսի իշխանության տակ: Եզրի իշխանությունը երկրի արևմտյան մասի հայերի վրա օրինալոր ճանաչվելու համար նա պետք է հաղորդվեր կայսեր հետ, հակառակ դեպքում նա կմնար միայն պարսկական տիրապետության տակ գտնված Հայաստանի կաթողիկոս: Ուստի Մժեժ Գնունու պահանջը կտրուկ էր ու անառարկելի. «Ասէ ցկաթողիկոսն ցեզր՝ երթալ նմա յերկիր սահմանացն Յունաց և հաղորդել արինաւք ընդ կայսեր. ապա թէ ոչ՝ արասցուք մեզ ալ կաթողիկոս. և դու կալ զիշխանութիւնդ քոյ ի Պարսից կողմանէ»¹⁹: Մժեժ Գնունու սպառնալիքը ցույց է տալիս, որ Եզր կաթողիկոսն սկզբնական շրջանում խուսափողական դիրք է գրավել և փորձել է ծանր դրությունից դուրս գալու ճանապարհ գտնել²⁰: Դեռևս Մորիկ կայսրը, ինչպես գիտենք, ստեղծել էր նման դրություն: Հակաթուո կաթողիկոսության դեպքում Եզրը զրկվելու էր Արևմտյան Հայաստանի նկատմամբ եկեղեցական իշխանությունից: Մժեժ Գնունու սպառնալիքն ազդում է Եզրի վրա, որը կայսրին է դիմում խնդրելով իրեն ներկայացնել հավատի նոր բանաձևը: Քաղկեդոնականությունը ընդունելու դեպքում Եզրն իր դեմ դուրս կբերեր հակաքաղկեդոնիկ հայ հոգևորականությանը, բայց Հերակլի և Սերգիոս պատրիարքի դավանական նոր ձևակերպումը զգալիորեն հեշտացրել էր մերձեցումը: Այսպես կոչված միակամ դավանանքը, որը ո՛չ քաղկեդոնական էր, ո՛չ նեստորական, և ո՛չ էլ միաբնակ (մոնոֆիզիտ), տարբեր մեկնաբանության տեղիք տվեց նրա հետևորդների և հակառակորդներին կողմից Բյուզանդիայում և Հայաստանում:

Եզր կաթողիկոսը կայսեր առաջարկի շուրջը խորհրդակցում է Մարզպանական Հայաստանի սպարապետ Թեոդորոս Ռշտունու և այլ նախարարների հետ: Թեոդորոս Ռշտունին, շնայած հակաքաղկեդոնական էր, մյուս նախարարների հետ ի վերջո համաձայնվում է կայսեր և Եզրի հանդիպմանը, պայմանով, որ կաթողիկոսը պաշտպանի հայոց եկեղեցու իրավունքը: Եզրն այդ նպատակով իր հետ պետք է տաներ դավանական ուսմունքի հմուտ վարդապետներ՝ Մաթուսաղա Սյունեցուն և Հովհաննես Մայրավանեցուն, որն այդ ժամանակ Դվինում էր՝ որպես Ս. Դրիգոր եկեղեցու փակակալ, և տնօրինում էր կաթողիկոսարանի գործերը: Բայց այս երկու հոգևորականները, պատճա-

18 Ю. Кулаковский, История Византии, т. III, Киев, 1915, էջ 125:

19 Ս եր ե ո ս, էջ 102. հմտ. Հ ո վ հ ա ն ն ե ս Դ ր ա ս խ ա ն ա կ եր տ գ ի, Պատմութիւն Հայոց, Բիֆլիս, 1912, էջ 77:

20 Մ. Օրմանյան, նշվ. աշխ., էջ 688:

ուարանելով իրենց զբաղվածությունը, հրաժարվում են կաթողիկոսին ընկերակցել: Ուստի Եզրը 'Իվինից կայսեր մոտ է մեկնում իր հետ տանելով Արտաղի արքեպիսկոպոս Տիրատուրին, Քրիստափոր Դարունյաց, Մարտիրոս Դողթնյաց, Եպիփան Մամիկոնեից եպիսկոպոսներին, Վարդան Բաղադիճո, Թովմաս Արշարունյաց և Թեոդորոս Քրթենավոր վարդապետներին ու մի քանի ոչ նշանավոր եկեղեցականներ²¹:

Պատմիչների միայն Սեբեոսն է, որ Եզր կաթողիկոսի կայսեր հետ հանդիպման վայր է համարում «յերկիրն Ասորեստանի»²², այսինքն՝ Ասորիքը, առանց կենդանու նշելու տեղը: Որոշ պատմաբաններ հիմք են ընդունել այդ տեղեկությունը²³, բայց, սակայն, հավանական չէ: Գրեթե մյուս բոլոր պատմիչների ասելով այդ հանդիպումը տեղի է ունեցել Կարին քաղաքում²⁴, Հայոց եկեղեցու պատմությանը նվիրված ուսումնասիրություններում արժանահավատ է համարվել այս վկայությունը²⁵:

Աղբյուրները տարբեր տեղեկություններ են հաղորդում նաև այդ հանդիպման տարեթվի մասին: «Սա (Հերակլ կայսրը — Վ. Ի.), — ասում է ժամանակակից Անանիա Շիրակացին, — յեթն եւ ի տասն ամին իւրոյ սպան զԽոսրով եւ դարձոյց զսուրբ Խաչըն. եւ ինն եւ տասն ամին (610—19—620) արար ժողով ի Թեոդոսուպոլիս, որ այժմ ասի Կարնոյ քաղաք, բաղում եպիսկոպոսաց, առ Եզրի կաթողիկոսի Հայոց եւ Հոռոմոց, եւ Ասորոց, յորում Հայք Քաղկեդոնիկը եղեն, եւ զժողովն ընկալան»²⁶, իսկ այլ ձևազրույց ասված է. «Սա (Հերակլ կայսրը — Վ. Ի.) յեթն եւ ի տասն ամին (610+17=627) արար ժողով ի Թեոդոսուպոլիս»²⁷:

Հովհան Իմաստասերի ասելով «սա (Հերակլ կայսրը — Վ. Ի.) ի ԺԵ (610+17=625) ամի թապաւորութեանն իւրոյ սպան զԽոսրով արքայն Պարսից, եւ դարձոյց զսուրբ Խաչն, իսկ ապա զկնի ԸԺ (610+18=628) ամի արար ժողով ի Կարնոյ քաղաքի»²⁸:

Ուշագրավ է նաև *Narratio de rebus Armeniae* կոչված գրքի (գրվել է շուրջ 700 թ.) անհայտ հեղինակի հետևյալ վկայությունը. «Խոսրովի մահվան Բ(4) տարին Հերակլի թագավորության ԻԲ (23) (610+23=633) տարին (Հերակլը) դալով Մեծ Հայք հրամայեց Թեոդոսուպոլսում մեծ ժողով գումարել՝ բոլոր եպիսկոպոսներին և վարդապետների, կաթողիկոս Եզրի և բոլոր աղատների մոսնոկոսությանը, քննելու և կրակացության հանգելու համար

21 Մ. Չամչյան, Պատմություն հայոց, հատ. Բ, Վենետիկ, 1785, էջ 328:

22 Սեբեոս, էջ 102:

23 Кулаковскій, նշվ. աշխ., էջ 126, 131, և Կո, երկերի ժողովածու, 2, էջ 300 և այլն:

24 Տե՛ս Ա. Արրահամյան, Շիրակացու ժատենագրությունը, Երևան, 1944, էջ 397: «Գիրք Բղթոց», Թիֆլիս, 1901, էջ 221: «Narratio de rebus Armeniae» (տե՛ս «Բանբեր Մատենադարանի» № 6, Երևան, 1962), էջ 468: Ստեփանոս Ասողիկ, Պատմություն Տիեզերական, Պետերբուրգ, 1885, էջ 87: Սամվել Անեցի, Հաւարմունք ի գրոց պատմագրաց յաղագր զիւտի ժամանակաց անցելոց մինչև ի ներկայս ժայրաքաղ արարեալ, Վաղարշապատ, 1893, էջ 73: Միխայել Ասուրի, Ժամանակագրություն, Յերուսաղեմ, 1871, էջ 300: Կիրակոս Դանձակեցի, Պատմություն հայոց, Երևան, 1961, էջ 54 և այլն:

25 Մ. Օրմանյան, նշվ. աշխ., էջ 690:

26 Անանիա Շիրակացի, էջ 397:

27 Տե՛ս «Անանուն ժամանակագրություն», Վենետիկ, 1904, էջ 76:

28 Տե՛ս «Գիրք Բղթոց», էջ 221:

Քրիստոսի՝ մեր աստծո երկու բնությունների և Քաղկեդոնի ժողովի հարցը շուրջը՝

Երեսուն օր նրանք քննեցին այդ հարցը, և հայերը համովեցին (սուրբ հայրերի) զրբերի, և իրենց ձեռքով ստորագրեցին ու երգվեցին այլևս այդ մասին հրեք չհակառակել»²⁹։

Այլ աղբյուրների վկայության համաձայն եկեղեցական ժողովը Կարինում գումարվել է Հերակլի 9-րդ տարում (610 + 9 = 619)³⁰, Ու (640) թվականին³¹, Եղրի կաթողիկոսության երրորդ տարում³² (632), Ձէ (638) թվականին³³։

Հերակլ կայսրը, ինչպես հաղորդում են աղբյուրները, հայերի և ասորիների հետ եկեղեցական միաբանության հարցով զբաղվել է իր պարսկական արշավանքները հաղթականորեն ավարտելուց (628) և «հաշտությամբ» երուսաղէմ վերադարձնելուց հետո։ Ուստի մեզ հավանական է թվում *Narratio de rebus Armeniae*-ի տվյալը՝ 633 թ.։

Եզր կաթողիկոսը, ուսումնասիրողների կարծիքով, Հերակլ կայսեր հետ հանդիպել է համաձայնագրի 633³⁴ կամ 633—634 թթ.³⁵։

Սեբեոսը Հերակլ կայսեր և Եզր կաթողիկոսի միջև տեղի ունեցած հարաբերությունների մասին հաղորդում է, որ Եզրն սկզբում չի կարողանում մեկնել Երևանի և նրա խնդրանքով կայսրն ուղարկում է դավանական նոր բանաձևը («Չեռնարկ հալաթու»), որտեղ նշույվում էին նեստորը և մյուս բոլոր աղանդավորները, բայց ոչ Քաղկեդոնի ժողովը³⁶։ Կաթողիկոսը գնում է ու հանդիպում կայսեր հետ, նրանից որպես պարգև ստանում է Կողբի աղահանքը և մեծ շուքով վերադառնում Հայաստան³⁷։ Միաբնակ Միխայել Ասորի պատրիարքը դատապարտում է Եզրի այդ քայլը, վերագրելով այն նրա ազահուսթյանը և անմտությանը. «Եւ ժողովեցան ՚ի Թէրզոպօլիս և դարձոյց (Հերակլ կայսրը—վ. Ի.) զբաղումս ՚ի Հայոց յաղանդն իւր ՚ի ձեռն Եզրի, զոր կաշառեաց զազահութիւն նորա և խաբեաց զանմտութիւն նորա»³⁸։

Ավելի ուշ ժամանակի պատմիչները, մանավանդ Ստեփանոս Օրբելյանը, այդ իրադարձության պատմությունը հաղորդում են համեմատաբար ընդարձակ կերպով և վիպական դունազարդամբ։

Ըստ Ստ. Օրբելյանի, կաթողիկոսը կայսրին ընդդիմանալու պատասխան չի գտնում և համաձայնվում է միաբանել բյուզանդական եկեղեցու հետ³⁹։

Դավանական նոր բանաձևը բոլորն ընդունում, ստորագրում և կայսրին են ներկայացնում։ Ուրախացած Հերակլը հրամայում է հանդիսավոր արարողու-

29 «*Narratio de rebus Armeniae*», էջ 468։

30 Հովհան Մամիկոնյան, Պատմութիւն Տարօնոյ, Երևան, 1941, էջ 249։

31 Սամվել Անեցի, էջ 80։

32 Ստեփանոս Օրբելյան, Պատմութիւն նահանգին Նիսական, Թիֆլիս, 1911, էջ 114։

33 «Անանուն ժամանակագրություն» (XIII դ.), տե՛ս «Մանր ժամանակագրություններ XIII—XVIII դդ.», կազմեց Վ. Հակոբյան, հատ. I, Երևան, 1951, էջ 24։

34 *Ի. Օրմանյան*, նշվ. աշխ., էջ 686—687։ Pargoire, *l'Eglise Byzantine de 527 à 847*, Paris, 1905, էջ 183։

35 Լեո, Երկերի ժողովածու, 2, էջ 300։

36 Սեբեոս, էջ 102։

37 Նույն տեղում, հմտ. «Գիրք թղթոց», էջ 221—222։ Անանիա Շիրակացի, էջ 397։ Ս. Անեցի, էջ 79—80։ Վարդան Բարձրբերդցի, Պատմութիւն տիեզերական, Մոսկվա, 1861, էջ 86։

38 Միխայել Ասորի, էջ 300։

39 Օրբելյան, էջ 117—118։

թյուն կատարել Կարինի եկեղեցու մեջ և պատարագի ժամանակ կայսրն ու կաթողիկոսը, նմանապես նրանց հետ գտնված հույները և հայերը միասին հաղորդվում են, այսինքն հաղորդությունն ընդունում են միեւնոյն սկիհից: Մինչև հիմա Կարինի մայր եկեղեցուն կից կա Միաբան սուրբ Աստվածածին կոչված փոքրիկ մի եկեղեցի. սբ. Ինչպես կարծում են, այդ հայ-հունական միաբանության հիշատակ է և շնայած վրան որեւէ արձանագրություն չկա, բայց Եզրի ժամանակի չափ հին լինելու նշաններ ունի⁴⁰:

Կաթողիկոսը և հայ հոգևորականությունը, հաղորդվելուց բացի, նաև «եստուն ձեռնարկ միաբանության արքայի: Խնդրեցին և զՔաղկեդոնին զոր Եռթագաւորն ոսկեղիր մագաղաթաւ պարգև Եզրի ղերրորդ մասն դիւղաքաղաքին Կողբայ և զաղսն բովանդակ⁴¹: Ուլ անմիտ և շար վաճառին: Եւ այնպէս մեծամեծ փառօք և հրեւելի պարգևօք հրաժարեալք յարքայէն՝ դարձան ի Դվին կապուտք, կողոպուտք ի ճշմարիտ հաւատոյն: Եւ անդ կամեցան ժողովով հաստատել զնոր օրէնսն զոր արին»⁴², — դառնացած վերջափակում է այդ գործարքը հայրենասեր պատմիչը:

Մաթուսաղա Սյունեցին ձեռնագրվում է Սյունիքի եպիսկոպոս և միանում է բուղանդական եկեղեցու հետ Եզրի կնքած գործարքին, մինչդեռ Հովհաննէս Մայրավանեցին խիստ ընդդիմանում է կաթողիկոսին, ասելով. «Յիրաւի կոչեցար Եզր ղի եզր և վաճառն եղեր հաւատոյ ուղղափառութեան»⁴³, բայց խիստ հալածվում է ու քաշվում Մայրավանք՝ կաթողիկոսից ստանալով Մայրագոմեցի մականունը: Դվինում գումարված եկեղեցական ժողովը հաստատում է, «զնոր օրէնսն» և «Հայք կացին ի նոյն յաղանդն յաւուրս 6 կաթողիկոսաց ամս 85, մինչ... Յովհան Օձնեցին»⁴⁴:

Ստեփանոս Օրբելյանը այնուհետև մեջբերում է նաև «Թուղթ Մաթուսաղայի՝ Սիւնեաց եպիսկոպոսի, զոր զրեաց հրամանաւ Տեառն Եզրի՝ Հայոց կաթողիկոսի. ևւ այլ եպիսկոպոսաց Հայոց, առ Բագաւորն Հերակլ վասն հաւատոյ»⁴⁵, որտեղ կայսեր տված հավատի թուղթը համարվում է ճշմարիտ և ուղիղ:

633—634 թթ. մինչև Հովհաննէս Օձնեցու կաթողիկոսությունը (717—728), հայոց եկեղեցին հետևել է քաղկեդոնական ծեսերին: Նույն կաթողիկոսը, խոսելով խոսքով II-ի դեմ (590—628) Հերակլ I կայսեր տարած հաղթանակի մասին, այնուհետև ասում է. «Իսկ նորա հաստատեալ զաթոռ հայրապետութեան Եզրի զՀայք քաղկեդոնիկ արար, վասն ղի կաթողիկոսք յԵզրէ նստեալք մինչև ցայժմ (այսինք մինչև Հովհաննէս Օձնեցու կաթողիկոսությունը — Վ. Ի.) նոյն խոստովանությամբ Քաղկեդոնի վարեալ լինէին առ ի յաստեացս»⁴⁶:

Հերակլ կայսեր դավանական նոր ձևակերպումը և եկեղեցական քաղաքա-

40 Մ. Օրմանյան, Նշվ. աշխ., էջ 692:

41 Վարդան պատմիչի մի ձեռագիր օրինակի համաձայն Եզրի Կողբի հետ նաև «Առեալ զաղտք կամ զղաղցր» (էջ 86), բայց, ըստ Օրմանյանի, պետք է ընդունել, որ դա պրագմատիկ աղավաղված միևնույն «զաղսն» է (Ազգապատում, էջ 692):

42 Ստ. Օրբելյան, էջ 118:

43 Նույն տեղում, էջ 118:

44 Նույն տեղում, էջ 118—119:

45 Նույն տեղում, էջ 119—130:

46 «Գիրք թղթոց», էջ 223:

կանությունը ի վերջո նպատակին չհասան: Հպատակ ժողովուրդների և բյուզանդական պաշտոնական եկեղեցու միջև դավանական միություն չստեղծվեց և ատելությունն ու երկպառակությունը շարունակվեց: Դրա գլխավոր պատճառը այլադավանությունը չէր, այլ նվաճող-կեղեքողի և նվաճվող-կեղեքվողի միջև եղած անհաշտելի հակասությունը, որը շարունակվեց և հնարավոր չէր վերացնել: Կայսրության կողմից միակամ դավանանքի ստեղծումը, որը յուրատեսակ դիջում էր նրա հպատակ այլադավան (նեստորական, միաբնակ և այլն) հպատակներին, առաջացրեց բյուզանդական քաղկեդոնիկ եկեղեցու խիստ սթոպանությունը: Բյուզանդիայում միակամ դավանանքին, իր հերթին, հետևեցին շատ բերրի, և կայսրությունը ստիպված հրաժարվեց եկեղեցական նման քաղաքականությունից:

Եզր կաթողիկոսի և Հերակլ կայսեր եկեղեցական գործարքն էլ Հայաստանում քիչ ավելի ուշ դիտվեց որպես քաղկեդոնականության ընդունում:

Հայ հոգևորականությունը, ինչպես վկայում է Միքայել Ասորին, ի վերջո մերժում է եզրի գործարքը կայսեր հետ. «Այլ ոչ հնադանդեցան նմա (այսինքն՝ եզրին — Վ. Բ.) վանորայքն արեւելից և իմաստուն եպիսկոպոսքն և դբազում աշխարհս պահեցին յուղղափառութիւն անշարժելիս, մինչև յաղթեցին ճշմարիտքն և բարձաւ աղանդն շարութեան՝ ի ձեռն սքանչելագործ և իմաստուն առնն Աստուծոյ Յովհաննու Օձնեցոյն, որ յետ ութսուն և չորս ամաց տգիտաբար հաւանելոյն եզրայ, Յովհաննէս Օձնեցի կաթողիկոսն Հայոց Մեծաց, սլաժաւ կարգօք զարդարեաց զեկեղեցի աղօթիւք սրբոյն Գրիգորի Հայոց Լուսաւորչին և սուրբ որդւոցն իւրոց»⁴⁷:

Հայ պատմիչները, որպես կանոն, դատապարտում են եզրի՝ կայսրությանը կատարած դավանական վտանգավոր զիջումը և այդ սովորաբար համարում են կաթողիկոսի տգիտության արդյունք⁴⁸: Միայն Սեբեոսն է հաղորդում, թե եզրը կայսեր մոտից «դարձաւ մեծաւ շքով ի տուն իւր» և «սա էր այր խոնարհ և հեղ»⁴⁹: Եզրի և Հերակլի կնքած հայ-բյուզանդական եկեղեցական միության մասին մենք որևէ գրավոր փաստաթուղթ չունենք: Կարինում, ինչպես իրավացիորեն գտնում են, իսկական եկեղեցական ժողով չի գումարվել, չնայած որոշ աղբյուրներ վկայում են դրա օգտին⁵⁰, նիստեր տեղի չեն ունեցել, այլ, հրականում, հույները կայսեր հրամանի ձեռով նոր ոգով ձևակերպված դավանական դիրք են ներկայացրել քաղաքում գտնված մի քանի հոգևորականների՝ կաթողիկոսին, նրա հետ հղած չորս եպիսկոպոսի և երեք վարդապետի, որոնք քաղաքական աննպաստ պայմանների հետևանքով ստիպված համակերպվել են բյուզանդական սպառնալից պահանջին⁵¹:

Հայ-բյուզանդական դավանական միության հակառակորդների զլուխ

47 Միխայել Ասորի, էջ 301: Հմմտ. Ստ. Ասողիկ, էջ 102—103:

48 Հովհաննես Գրասխանակերտցի, էջ 77—78: Ստ. Ասողիկ, էջ 87: Վարդան, էջ 86: Ստ. Օրբելյան, էջ 114—119:

49 Սեբեոս, էջ 99—100:

50 «Գիրք թղթոց», էջ 221: Վարդան, էջ 115:

51 Մ. Օրմանյան, եջ. աշխ., էջ 693—694: Մեզ միանգամայն անհավանական է թվում Մ. Օրմանյանի այն ենթադրությունը, թե Սեբեոսը արդարացնում է եզրին, որովհետև «Մի գուցե ինքն ալ եզրի խորհրդակիցներեն մեկը եղած ըլլա» (էջ 692): Սեբեոսն իր «Պատմության» մեջ իրեն միշտ ցուցաբերում է հակաքաղկեդոնական և հայ-բյուզանդական եկեղեցական միության անհաշտ թշնամի:

կանգնում է Հովհաննես Մայրավանհի վարդապետը, անհաշտ պայքար մղելով կաթողիկոսի և նրա կողմնակիցների դեմ⁵²։ Դժգոհությունը այնքան խիստ էր, որ Եզրը Դվինում շմնաց, այլ, Սերևոսի ասելով, որոշ ժամանակ նա «ներստէր ի մէջ րանակին Յունաց, մինչև դաւրավարին հաճոյանալ ըստ կամաց նորա»։ Կարգէր զկարգս զինուորացն և բաշխումն շտեմարանաց ի վերայ ամենայն երկրին⁵³։

Պրոֆ. Լեոն սխալմամբ կարծում է, թե այդ զորավարը Թեոփոս Թշտունին էր⁵⁴։ Մինչդեռ վերջինս այդ ժամանակ սպարապետ էր Հայաստանի Արեւելյան մասում։ Պատմիչի խոսքը իրականում վերաբերում է ՄԺԺ Գնունուն, որն իրոք Արեւմտյան Հայաստանում գտնված բյուզանդական բանակի հրամանատարն էր։

ՄԺԺ Գնունին միջամտում էր Մարզպանական Հայաստանի ներքին գործերին և, ինչպես տեսանք, սուր թշնամանքի մեջ էր նրա մարզպան Վարապետրոցի հետ։ Արեւմտյան Հայաստանում նա հայածում էր իր հակառակորդ հայ իշխաններին։ Նա Դավիթ Սահառունուն՝ Արեւելյան Հայաստանի նախկին մարզպանին, մեղադրելով Հերակլ կայսեր դեմ կազմակերպված զավադրության մասնակցի լինելու մեջ, ձերբակալում է և կապանքների մեջ ուղարկում Կ. Պոլիս։ Բայց հայ իշխանը ճանապարհին արձակում է իր կապանքները, սպանում իրեն ուղեկցող պահապաններին, վերադառնում հայրենի երկիրը, կանգնում զորքի գլուխը և սպանում զորավար ՄԺԺ Գնունուն ու Վարապ Գնել Գնունուն։ «Եւ առ յինքն դաւրավարութիւնն կամակցութեամբ և սիրով ամենայն զաւրացն»⁵⁵։ Կայսրությունն սկսված արաբական արշավանքների պայմաններում ի վիճակի չէր սրելու հարաբերությունները հայերի հետ։ Ուստի Հերակլ I-ը հայ իշխանների միջնորդությամբ Դավիթ Սահառունուն տալիս է կյուրոպաղատություն՝ աստիճան և նշանակում Հայաստանի իշխան⁵⁶ (635—638)։ Կայսրության շահերի տեսաչէտից տվյալ դեպքում ավելի նպատակահարմար էր ունենալ զորքի և նախարարների համար ընդունելի, ընդունակ ու ձեռնհրեց կառավարիչ, ինչպիսին էր Դավիթ Սահառունին, քան ՄԺԺ Գնունուն մեկը, որը մի կողմ թողած խելամիտ ու ճկուն միջոցները, անտեսելով հայ նախարարների ցանկությունները, երկիրը կառավարում էր կամայական ու բռնի միջոցներով։ Ահա թե ինչու Կ. Պոլսի արքունիքը, առանց երկմտելու, հաշտվում է ՄԺԺ Գնունուն սպանության հետ և Հայաստանի բյուզանդական մասի իշխանությունը վստահում է Դավիթ Սահառունուն, որը դառնում է նրա առաջին կյուրոպաղատ⁵⁷։ Վերջինս երկիրը կառավարում է ինքնիշխան կերպով և, պատմիչի ասելով՝ «ամս Դ ամենայն ճոխութեամբ մեծապէս», բայց այնուհետև մնչ

⁵² Տե՛ս «Narratio de rebus Armeniacis», էջ 468—469։

⁵³ Ս ե ր և ո ս. Էջ 102։ Այստեղ պատմիչի մոտ տեքստի իմաստը, ինչպես նկատել են, պարզ չէ։ Ինչպե՞ս կարող էր կաթողիկոսը զինվորական կարգ սահմանել կամ ի՞նչ շտեմարաններ էր նա բաշխում ամբողջ երկրում, տարօրինակ է ու անհասկանալի (տե՛ս Себеос, История, Ереван, 1939, էջ 168, ծանոթ. 152)։

⁵⁴ Լ և ո, Երկերի ժողովածու, 2, էջ 301։

⁵⁵ Ս ե ր և ո ս, էջ 104։

⁵⁶ Նույն տեղում։ Հմմտ. Հովհաննես Դրասխանակերտցի, էջ 80։ Սերևոսի այս տեղեկությունը հաստատվում է Դավիթ Սահառունու կառուցած Մրենի տաճարի 639 թ. արձանագրության հետևյալ հիշատակությամբ. «Ամիոյն քսան եւ իններորդի Հերակղի րարեյաղթող թաղաւորի յիշխանութեան Դաւթի, ամենազով պատրկի կուրպաղատի եւ սպարապետի Հայոց և Ասորոց» (տե՛ս Н. А. Орбели, Избранные труды, Ереван, 1963, էջ 401)։

համար անհայտ պատճառներով «անարդեալ ի դարացն՝ հալածեցաւ, և անմիաբան լեալ ամենայն ազատացն՝ կորուսին զերկիրս Հայոց»⁵⁷։

Ընչո՞ւ է վերջացել 'Իսվիթ Սահառունու պաշտոնավարությունը բյուզանդական ծառայության միջ և կյանքը, մեզ հայտնի չէ։ 1234 թ. կազմված ժամանակագրության անանուն ասորի հեղինակը հաղորդում է, որ հույների 951 (— 639) թ. Դավիթ Հայի հրամանատարությամբ հայկական զորքը արշավել է դեպի Միջագետք՝ արաբների դեմ։ Այդ կարևոր տեղեկությունը օգտագործված չէ պատմական ուսումնասիրություններում։ Անհրաժեշտ ենք համարում մեջբերել անանուն ժամանակագրի մոտ եղած համապատասխան հատվածը բառացի. «Այն ժամանակ դուրս եկավ Դավիթ հայր, հոռոմների զորապետը, իսկ երկրից և Վալենտին անունով մի այլ մարդ՝ արևմուտքից։ Նրանք միմյանց դիպանեն ուղարկեցին (տեղեկացնելով — Վ. Ի.), որ մեկը կգնա արևելքից, մյուսը՝ արևմուտքից, և արաբները ճակատամարտում կկրցնեն բոլորը, ինչ կա Ասորիքում։ Արաբները տեղեկանալով, նախապատրաստվեցին և առաջինը գնացին Վալենտինի վրա և ճակատամարտում հաղթեցին ու ոչնչացրին նրա ամբողջ զորքը։ Իսկ Դավիթը գնաց և հասավ Միջագետք և իմացավ, որ այդ մարդում արաբներ չկան, որովհետև նրանք մեկնել էին Վալենտինի հետ եղած հոռոմներին կողոպտելու համար։

Երբ եկավ Դավիթ հայր, բանակեց Բետ-Մաադա կոչված գյուղի մոտ։ Շատ շարությունների ավելացման հետ զորքերը Դավթի հետ դուրս եկան և սկսեցին կողոպտել մարդկանց և նրանք ոչինչ չթողին. խիստ տառապանք պատճառեցին տղամարդկանց և կանանց, երկրում թաքցված գործերը հայտնի դարձնելու համար։ Եվ ուրիշ ոչինչ չէր լսվում աղաղակից ու լացից, արցունքից ու ցանգատից բացի, նամանավանդ ազնվականների կանանցից և մեծադարձ դուստրերից, որոնց նրանք ապականում էին կենակցելով և անամոթությամբ ու դու անում էին բացեկրաց, առանց ամոթի, նրանց ամուսինների և բոլոր աչքի առաջ։

Ձինվորականներից նրանց հետ կար Տիտ անունով մի տղամարդ, որը քաղաքներից մեկի զորապետն էր. նա, որ ծագումով ասորի էր, դուրս եկավ և գնաց նրա հետ։ Նրա տեսավ Դավիթ հայի ընկերների պատճառած շարությունը, մոտեցավ նրան և ասավ. «Ծիշտ չէ, որ դու լինելով բրիստոնյա և ծառայելով բրիստոնյա թագավորի, բրիստոնյաների դեմ գործադրում ես ավերածություններ և թույլ հս տալիս քո զինվորներին սպանելու բրիստոնյաների, մեղք գործելով Հոռոմների պետությունը և երբ թագավորը լսի այդ քեզ չի գովաբանի»։ Այն ժամանակ Դավիթ հայը հրամայեց, որպեսզի տեղական բնակիչներին ոչ ոք չարիք չպատճառի»։

Դավթի հայ զինվորները, լուր ստանալով Դամասկոսի մարզից արաբական զորքի գալու մասին, վախից թողնում են Միջագետքում ձեռք բերած ավարը և փախչում, բայց արաբները նրանց հետապնդում են և անխնա սրի քաշում։ Դավիթը զինվորական օգնություն է խնդրում Տիտ զորավարից, որը, սակայն, հրաժարվում է համագործակցելուց և հեռանալով նրանից, փրկվում։ «Իսկ Դավիթն ամբողջ զորքի հետ զոհվեց ճակատամարտում, երբ սրով ոչնչացնում էին, այնպես որ նրանցից ոչ մեկը (կենդանի — Վ. Ի.) չմնաց», եղ-

⁵⁷ Ս ե ո ե ո ս, Հ. 104։ Դավիթ Սահառունի, Սեն-Մարտենի ասելով, իր պաշտոնից հեռացվել է 633 թ. (Mémoires historiques et géographiques sur l'Arménie, Paris, 1818, t. 1, էջ 336), որը ճիշտ չէ։

րափակում է ասորի ժամանակագիրը Դավիթ Հայի հետ կապված պատմությունը⁵⁸:

Այս տեղեկությունից մենք իմանում ենք, որ Դավիթը հայ է, բյուզանդական զորավար, 639 թ. Վաղենտինոս զորավարի հետ համաձայնեցված հայկական զորքով արշավել է արաբների դեմ «իր երկրից», «արևելքից» դեպի Միջագետք և իր զինվորների հետ զոհվել կռվում: Ով է այս Դավիթ Հայը. արդյոք որևէ ընդհանրություն ունի՞ Հայաստանը տվյալ ժամանակի բյուզանդական կառավարիչ կուրտպաղատ Դավիթ Սահառունու հետ, թե ոչ: Աղբյուրներում, դժբախտաբար, չկան անհրաժեշտ փաստեր պարզելու «Դավիթ Հայի» անձնավորությունը:

Աղբյուրները որոշակի տեղեկություն չեն հաղորդում Դավիթ Սահառունու մասին: Նա սպանել է Մեծ Գնունուն և որպես Հայաստանի բյուզանդական մասի կառավարիչ, կառավարել է ըստ Սեբեոսի «ամս Գ»⁵⁹, ըստ Հովհաննես Դրասխանակերտցու՝ «ամս Դ»⁶⁰, Սուրեն մարզպանի սպանությունից (572 թ.) հետո, Ստ. Ասողիկի ասելով, պարսից թագավորը Հայաստանում այլևս մարզպան չի նշանակում, «այլ ի խնդրոյ նախարարացն իշխան հաստատէ Հայոց զԴավիթ Սահառունի, որ կալուս զհաղարապետութիւն Հայոց ամս Լ հրամանաւ Որմզդի, որդւոյ խոսրովու Պարսից արքային»⁶¹: «Իսկ զկնի Դաւթի Սահառունուոյ եկաց իշխան Հայոց Թէոդորոս Ռշտունի ամս ԻԾ»⁶², Ըստ Սամվել Անեցու տեղեկության՝ «ՈԺԱ. (= 611), (ՈԸ) = 58 + 551 = 609», Յետ մարզպանացն սպանման ճիհր Բուղանայ՝ ճիհր Վշնասպուհենայ, ճիհր Վղովն Միհրանայ, և ալոց Տաճկաստանեաց՝ Դավիթ Սահառունի՝ ամս Լ»⁶³, Ստ. Օրբելյանի վկայությամբ, Բյւստափորին հաջորդում է Եղր կաթողիկոսը, «ամս 10»: «Ապա յերրորդ ամի կաթողիկոսութեան սորա, մինչ վախճանեալ էր Դավիթ Սահառունի, և առեալ զմարզպանութիւնն Հայոց Թէոդորոս Ռշտունի»⁶⁴, Եղրը աթուակալել է 630 թ., ուրեմն 633 թ. Դավիթ Սահառունին այլևս չկար: Մինչդեռ, ինչպես գտնում են, նա բյուզանդական կառավարիչ է եղել 631—636⁶⁵ կամ ավելի ճիշտ 635—638 թթ.⁶⁶, Դավիթ Սահառունին Արևելյան Հայաստանի մարզպան է եղել 635 թ. առաջ, այնուհետև Արևմտյան Հայաստանի բյուզանդական կառավարիչ: Նրա մահվան թվականը դժվար է ստույգ որոշել⁶⁷:

58 Տե՛ս Н. В. Пигулевская, Византия и Иран на рубеже VI и VII веков, М.—Л., 1946, էջ 287—288: Դավիթ Հայի Վաղենտինոս զորավարի հետ արաբների դեմ ձեռնարկած արշավանքի մասին տեղեկություն է հաղորդում XII դ. պատմիչ Միխայել Ասորին իր ժամանակագրության մեջ, բայց զգալիորեն տարբեր ձևով: Այս երկում, ինչպես կտեսնենք ստորև, արշավանքը տեղի է ունենում Կոստաս կայսեր (641—668) օրոք: Վաղենտինոսը սպանվում է արաբների կողմից Կիլիկիայում, իսկ Դավիթը, որը գնում է «վերին կողմամբ», բյուզանդական զորքով կողոպտում է քրիստոնյա րեակությունը և զորքի հետ ետ վերադառնում Կ. Պոլիս:

59 Սեբեոս, էջ 104:

60 Հովհաննես Դրասխանակերտցի, էջ 80:

61 Ստ. Ասողիկ, էջ 86:

62 Նույն տեղում, էջ 88:

63 Ս. Անեցի, էջ 77—78:

64 Ստ. Օրբելյան, էջ 114:

65 Տե՛ս Միխայել Ասորի, էջ 311, ծանոթ. 3:

66 Կ. Ռասմաջյան, ժամանակագրական պատմություն Հայոց, էջ 4:

67 Դավիթ Սահառունին, ինչպես կարծում են, մահացել է 639 թ. (տե՛ս Լեո, Նրկերի ժողովածու, 2, էջ 734—735, ծանոթ. 77):

Սևեռոսը, դժբախտաբար, չի հաղորդում հետագա իրադարձությունների մասին, որոնք երկրում առաջացրին քայքայում, անկում, որի գլխավոր պատճառը բյուզանդական տիրապետությունն էր։ Բյուզանդիան թուլացել էր ռազմականապես, իսկ Հայաստանը զրկվել էր թշնամուն դիմադրավելու անհրաժեշտ ունակությունից։

VII դարում խիստ ծանրանում է Բյուզանդիայի ներքին և արտաքին դրությունը։ Դանուբյան սահմանից շարունակվում են սլավոնական ցեղերի ներխուժումները և գաղութացումը Բալկաններում, որտեղ նրանք կաղմակերպում են մի շարք իշխանություններ։ Իսկ հարավից Բյուզանդիային այդ ժամանակ սպառնում էր արաբական էքսպանսիայի վտանգը։

* * *

Հերակլ I-ը և հաջորդ կայսրերը արաբական արշավանքների վերահաս վտանգի պայմաններում Փոքր Ասիան, ապա ամբողջ Բյուզանդիան բաժանում են վարչական նոր միավորների՝ թեմերի, զբաղվար ստրատեգների գլխավորությամբ, որոնք օժտված էին թե՛ ղինվորական, և թե՛ քաղաքացիական իշխանությամբ։ VII դարում, ինչպես գտնում են, Ասիայում և Արևմտյան Հայաստանում կաղմակահրավում են հետևյալ թեմերը. «1. Օպսիկիոն (Բիթինիա), 2. Անատոլիկոն (Ա. Հայք և Պոնտոս), 3. Արմենիակոն (Ա. և Բ. Կապադովկիա և Գ. Հայք), 4. Բրակեդիոն (Ասիա հին նահանգը), 5. Կիբիրայոտիսի Տրունգարիատը (ծովապետություն) (Պամփիլիա և Պիսիդիա)»⁶⁸։

VII դարում Փոքր Ասիայում կաղմակերպված ընդարձակ Արմենիակոն (Armeniakon) թեմի ղորամասերը նախապես հայերից էին բաղկացած⁶⁹։

Պետությունը թեմերի բաժանելու նպատակն էր ուժեղացնել վարչական կենտրոնացումը և կառավարումը, որը, սակայն, կայսրությանը չփրկեց տերիտորիալ մեծ կորստից։ Արաբները գրավում են բյուզանդական արևելյան նահանգների մեծ մասը և ցույց տալիս իրենց ռազմական անվիճելի գերազանցությունը կայսրության նկատմամբ։ Բյուզանդական անմարտունակ բանակը անընդհատ նահանջում էր, թշնամուն թողնելով նահանգ նահանգի ետևից։

640 թ. գարնանը արաբները Հյուսիսային Միջագետքից ներխուժում են Զորրերդ Հայք, Տարոն, ապա Վանա լճի ավազանից մտնում են Աւրարատ, հոկտեմբերի 2-ին պաշարում են Դվինը, իսկ հոկտեմբերի 6-ին գրոհով գրավելով քաղաքը, կողոպտում, ավերում և հարուստ ավարով ու բաղմաքանակ գերիներով հեռանում են Հայաստանից։ Արաբները երկրում չեն հանդիպում կաղմակերպված բնիկ ռազմական ուժի լուրջ դիմադրության։ Միայն Թեոդորոս Ռշտունին՝ Մարզպանական Հայաստանի սպարապետը, Կոզովիտում իր փորթաթիվ զորախմբով փորձում է հեռացող արաբներից խել հափշտակված ավարդ և ռազմազեններին, բայց կրում է ծանր կորուստներ և ետ քաշվում։

Թ. Ռշտունու արաբների վրա ձեռնարկած այդ հանդուգն հարձակումը բարձրացնում է նրա հեղինակությունը Բյուզանդիայում։ Նա Հայաստանում արդեն ազդեցիկ քաղաքական և զինվորական գործիչ էր, որին կայսրությունը

⁶⁸ Տե՛ս Հ. Գեղցեր, Համառոտություն բյուզանդական կայսրերի պատմության, էջ 127, ծանոթ. 1. նման. A. Vanilliev, Histoire de l'Empire Byzantin. t. I. Paris. 1932, էջ 300, 302; Ш. Дилъ, История Византийской империи, Москва, 1948, էջ 52; P. Charanis, The armenians in the Byzantine Empire, Lisbon, 1963, էջ 19.

⁶⁹ P. Charanis, նշվ. աշխ., էջ 21.

ձգտում էր իր կողմը գրավել՝ հայկերի զինական ուժն արաբների դեմ օգտագործելու և բյուզանդական տիրապետությունը երկրում ամրապնդելու համար: Չնայած հայ անվանի զորավարը այնուհետև ոչ թե ենթարկվում է կայսրության թելադրանքին, այլ գործում է իր կամքով, հիմք ընդունելով ժողովրդի շահերը, այսուհանդերձ՝ «իսկ ի ձեռն այնր պատերազմի ի կայսերէ հրաման հասեալ վարավարութեանն Թէոդորոսի Ռշտունեաց տեառն՝ հանդերձ պատերկութեան պատուով»⁷⁰: Թեոդորոս Ռշտունին պատրիկության պատիվ է ստացել և Հայաստանի զորավար նշանակվել արաբների կողմից Դվինը գրավելուց քիչ հետո, հավանաբար, 641 թ.: Նա Հայաստանում, ինչպես գտնում են, բյուզանդական կառավարչի պաշտոնը վարում է 641—646 թթ.⁷¹: Աղբյուրներում արաբների դեմ Հայաստանում բյուզանդական զորքի գործողությունների մասին ոչ մի տեղեկություն չունենք: Եվ դա պատահական չէ: Իրադարձությունների ժամանակակից Մեքենսը հաղորդում է հետևյալ ուշագրավ փաստը. «Մեռաւ Երակղոս, և թագաւորեաց որդի նորա Կոստանդին: Եւ ոչ ոք ընտեցաւ զաւրաւար լաշխաւիկն Հայոց. քանզի անմիաբան լիալ իշխանացն՝ մեկնեցան ի միմեանց»⁷²: Ինչպես հայ իշխանների անմիաբանության հետևանքով Հայաստանը չի ունեցել անգամ զորահրամանատար, որ կազմակերպեր երկրի զինվորական ուժերը թշնամու դեմ: Հայաստանում ֆեոդալական խմբավորումները միջև պարբերաբար տեղի էին ունենում երկպառակություններ և երկրում փաստորեն ունեւ իշխանություն գոյություն չունեի:

Կոստանդին I-ը կայսրը (641 թ.) բյուզանդական զորքի հրամանատար է նշանակում հայ անվանի զորավար Վաղենտինոս Արշակունուն և հրամայում է նրան՝ անհապաղ մեկնել արևելք: Նա, ներսեա Գ իշխանցի կաթողիկոսի (641—661) միջնորդությամբ, Հայաստանի զորահրամանատար է կարգում Թեոդորոս Ռշտունուն և նրան տալիս պատրիկի բարձր պատվաստիճանը⁷³: Քանի որ Թեոդորոս Ռշտունին մինչ այդ նաև Արևելյան Հայաստանի սպարապետն էր, հետևաբար այժմ նա դառնում է ամբողջ երկրի հայկական զինված ուժերի տնօրինողը:

Կոստաս կայսրը⁷⁴ (641—668), Միխայել Ասորու վկայությամբ, իր գահակալումը սկսում է արևելքում, մասնավորապես արաբների դեմ ծավալելով պատերազմական ակտիվ գործողություններ. «Եւ թագաւորն Կոստոս ժողովեաց զօրս և արար բաժինս երկուս, զմինն ետ ՚ի ձեռս Հայկազնոյ ումեմն, որում անունն Դաւիթ էր, և զմիւսն ՚ի ձեռս Վաղինեայ, որ զնաց ընդ Կիլիկիա և սպանաւ ՚ի Տաճկացն որք եկեալ էին հնազանդել զԿիլիկիա, և ելին ընդդէմ Էոքա և սպառեցին զՅոյնսն, սակաւ ինչ թողեալ փախստեալս: Եւ Դաւիթ զնաց վերին կողմամբն. և զօրքն Հոռմայեցիք որք ընդ նմա, ոչ ինչ պակաս քան զՀաղարացիսն զործէին կողոպտելով զքրիստոնեայսն, և առնուին ոսկի և արծաթ և հանդերձս, այլ և զկանայս խայտառակէին յանդիման արանցն»⁷⁵:

Վաղենտինոսի հարձակումը նպատակ է ունեցել Կիլիկիան ետ գրավել:

70 Ս ե բ ե ո ս, էջ 110:

71 Կ. Բ ա ս մ ա ջ յ ա ն, Ժամանակագրական պատմություն Հայոց, էջ 4:

72 Ս ե բ ե ո ս, էջ 109, հմտ. Հ ո վ հ ա ն ն ե ս Դ ր ա ս խ ա ն ա կ ե ր տ ց ի, էջ 82:

73 Հ ո վ հ ա ն ն ե ս Դ ր ա ս խ ա ն ա կ ե ր տ ց ի, էջ 84:

74 Հերակլի մահվանից հետո նրան հաջորդեցին երկու որդիները՝ Կոստանդին և Հերակլոն, սակայն շուտով Կոստանդինը մեռավ և կայսր հայտարարվեց նրա որդին՝ Կոստաս II (641—668):

75 Մ ի խ ա յ ե լ Ա ս ո Ր ի, էջ 311—312:

արարներից, բայց այն ավարտվել է բյուզանդական զորքի խայտառակ սլար-տությունը: Դավիթ զորավարի արշավանքը, ինչպես տեսնում ենք, կրել է ավա-րառական բնույթ: Լևոն արշավանքի պատճառը մեզ հայտնի չէ: Տուժած քրիստոնյա բնակչությունը, նույն ժամանակագրի ասելով, բողոքում է բյու-զանդացիների ասսլատակությունների ու բռնությունների դեմ ու հայազգի զո-րավարը իր զորքով վերադառնում է Կ. Պոլիս: Աղբյուրներում այս իրադար-ձությունը վերաբերյալ մենք այլ տեղեկություն չունենք: Դավիթ հայկազն զո-րավարը, Սիսայել Ասորու ժամանակագրության հրատարակիչների կարծի-քով⁷⁵, Դավիթ Սահառունին է, որին Հերակլ I կայսրը Հայաստանի կյուրոպա-ղատ է նշանակել 631 թ., իսկ Վաղենտիանոսը Սեբեոսի մոտ հիշատակված Վաղենտիանոս Արշակունին է, որն օգնեց դահակալելու Կոստաս II-ին: Իրա-կանում, մեկ թվում է, այդպես չէ: Կոստաս II կայսրը, ինչպես հայտնի է, կա-ռավարել է 641—668 թթ., իսկ Դավիթ Սահառունին կյուրոպաղատ է եղել 635—638 թթ., հետևաբար նրանք չորժել են տարբեր ժամանակներում:

Այդ ժամանակ արսորից վերադարձած վարադտիրոց Բագրատունին նշա-նակվում է Հայոց իշխան, սակայն տեղ չհասած մեռնում է և Հայաստանում զինվորակառն ու քաղաքական ասպարեզում կենտրոնական դեմքը մնում է Թեոդորոս Ռշտունին: 643 թ. արաբները նորից են ներխուժում Հայաստան, իսկ Թեոդորոս Ռշտունին և Հայաստանում բյուզանդական զորքի հրամանա-տար Պրոկոպիոսը պարտվում են:

Դրանից մի րանի տարի անց արաբները կրկին հարձակվում են Հայաս-տանի վրա, բայց Արձափ բերդի պաշարման ժամանակ Թեոդորոս Ռշտունին հաղթում է նրանց և փախուստի մատնում: Չնայած Թեոդորոսի համառ դի-մադրությանը արաբներին և հաջորդակցությունը Բյուզանդիայի հետ, վեր-ջինս նենգ վերաբերմունք է ցուցաբերում. Պրոկոպիոս զորավարը թշնամա-նում է նրան, իսկ Կ. Պոլսից ուղարկված Թումա անունով մի ոմն պաշտոնյա նույնիսկ ձերբակալում է Թեոդորոսին, թեև կայսրը անմիջապես արդարաց-նում է նրան և վերահաստատում իր պաշտոնի մեջ:

Արաբական երկու արշավանքները դգայի ավերածություններ էին գործել Հայաստանում: Այն ժամանակ, երբ երկրի վրա գնալով ուժեղանում էր ա-րաբների նոր ներխուժման սպառնալիքը, կայսրությունը փոխանակ հոգ տա-նելու Հայաստանի պաշտպանության ամրապնդման, հայ-բյուզանդական հա-րաբերությունների բարելավման մասին, նորից է հայերին առաջարկում ըն-դունել քաղկեդոնականություն՝ սրելով դավանաբանական վեճերը և փոխա-դարձ թշնամանքը:

Քաղկեդոնականություն ընդունել տալը, որին դարեր շարունակ ձգտել է կայսրությունը, վերջին հաշվով նշանակում էր Բյուզանդիայի քաղաքական գերիշխանության ամրապնդումը Հայաստանում, քանի որ հեշտացնում էր հայերի լիակատար ձուլումը հունական-բյուզանդական տարրի մեջ: Ուստի պատահական չէ, որ հայերը կայսրության դեմ մղած ազատագրական պայ-քարում հակաքաղկեդոնական-լուսավորչականությունը հաճախ սլարդել են որ-պես դավանաբանական դրոշ, իրենց անկախության վերականգնման քաղաքա-կան դրոշի կողքին⁷⁷: Ահա թե ինչու հայերի վրա քաղկեդոնականության բռ-

76 Տե՛ս նույն տեղում, էջ 311, ծանոթ. 3, էջ 312, ծանոթ. 1:

77 Բ. Առաքելյան, նշվ. աշխ., էջ 69:

նագասությունը գործադրվում է նաև արտաքին մահացու վտանգի՝ արաբական արշավանքների ժամանակ: Կայսրությունը դարձյալ կարծում է, թե հայերի՝ բաղկեղոնականացնելով ինքը կվերացնի հայ-բյուզանդական եկեղեցական անշրպիտը և կամրապնդի արաբական արշավանքների հետևանքով զգալիորեն: Թուլությամբ իր տիրապետությունը Հայաստանում:

Ինչպես V—VI դդ. հայ ազատագրական շարժումների, այնպես էլ արաբա-բյուզանդական պատերազմների ժամանակ, երբ արշունահեղ գոտեմարտեր են մղվում մեկի կամ մյուսի գերիշխանության համար, արտաքին նվաճողների միջև կողմնորոշման խնդրի շուրջը հայ աշխարհիկ և եկեղեցական ֆեոդալական շրջաններում սկսում են առաջանալ ու որոշակիորեն կազմավորվել երկու տարբեր և իրար հակադիր ուղղություններ կամ խմբավորումներ:

Բյուզանդական արքունիքը և եկեղեցին հույս ունենին հայերի հետ դավանական միության հասնել օգտագործելով ոչ միայն Հայաստանում ունեցած քաղաքական իշխանությունը, զինվորական ուժը, այլև իրենց կողմնակից հայ աշխարհիկ ու եկեղեցական գործիչներին: Երկրում բյուզանդական տիրապետության և բաղկեղոնիկ եկեղեցու հաստատման կողմնակից էր ժամանակի կաթողիկոս Ներսես Գ-ն, որը ծնվել էր Տայքի Իշխան գյուղում, բայց վաղ հասակում սուրբ Լր և կթություն ստացել Բյուզանդիայում, յուրացրել հունարեն լեզուն ու դպրությունը, կատարել զինվորական ծառայություն: Սերետուր, որը համամիտ չէ Ներսեսի քաղաքական և եկեղեցական հայացքներին, նրա մասին հաղորդում է հետևյալը. «Ձի էր նա բնակութեամբ ի Տայոց, ի գեղջէն, որում Իշխանն կոչեն: Եւ սնեալ ի մանկութենէ յաշխարհին Յունաց և ուսեալ զլեզուս և զգպրութիւն Հուռմին, և շրջեալ ընդ աշխարհս զաւրու կարգաւք զինուորութեան»⁷⁸: Բյուզանդական կրթությունն, անշուշտ, իր հայտնի գերն Լր խաղացել նրա մեջ եկեղեցական սահակետից բաղկեղոնական համոզմունք ձևավորելու, իսկ քաղաքականապես՝ դեպի կայսրությունը կողմնորոշելու հարցում: VIII դարի բաղկեղոնական անանուն եկեղեցական պատմիչը ևս հաստատում է, որ «նա (Ներսես Գ կաթողիկոսը—Վ. Ի.) համահաղորդակից էր հռոմայեցիների կայսեր»⁷⁹: Հովհաննես Մայրագոմեցի վանականը, ինչպես վկայում է IX դարի վրաց Արսեն Սափարեցի կաթողիկոսը, «Ներսեսին (Ներսեսին) տեսել էր Հունաստանում հաղորդվելիս Կոստանդին Փոքր թագավորի հետ»⁸⁰:

Ներսեսը Հայաստանում ազգային շահերին հակասող իր այդ հայացքները կարող էր արտահայտել միայն անհրաժեշտ պայմանների առկայության՝ բյուզանդական իշխանության ուժեղացման դեպքում, ըստ այնմ էլ նվազում կամ շատանում էին նրա կողմնակիցները հայ եկեղեցական և աշխարհիկ ֆեոդալական շրջաններում: Նրա համախոհները, ինչպես կտեսնենք, զգալիորեն ավելանում են, օրինակ, երբ Կոստաս II կայսրը զորքով արշավում է արևելք և կանգ առնում Կարին քաղաքում: Դեպի Բյուզանդիա էին կողմնորոշվում և նրա օգնությամբ ապավինում գերադանցապես Արևմտյան Հայաստանի հայ իշխանները և հողևորակաությունները, որոնք կայսրության տիրապետության տակ

⁷⁸ Ս ե ր և ո ս, էջ 143—144.

⁷⁹ «Narratio de rebus Armeniae», 469.

⁸⁰ Տե՛ս Լ. Մ Ե Լ Ի Բ Ե Ս Ե Թ-ը և Կ, 'Լրաց աղբյուրները Հայաստանի և հայերի մասին, հատ. Ա, Երևան, 1934, էջ 46:

գտնվելով, ենթարկվել էին նրա ազդեցությանը և իրենց շահերով կապված էին նրա հետ:

Հայաստանում քաղաքական մյուս խմբավորման գլուխ էր կանգնել ժամանակի պետական և զինվորական ականավոր գործիչ, հմուտ դիվանագետ ու մեծ հայրենասեր Թեոդորոս Ռշտունին, որը արտաքին և ներքին քաղաքականությունը որոշում է Լևնելով Էրկրի և ժողովրդի շահերից: Նա ստացել էր պարսկական կրթություն և պատմական փորձի հիման վրա չէր համակրում կայսրությանը, շնայած ընդհանուր առմամբ մինչև 652 թ. մինչև ջանք գործադրում է միավորելու հայ-բյուզանդական զինվորական ուժերը՝ արշավող արաբների դեմ: Թեոդորոս Ռշտունին հավանաբար դեռևս չէր պատկերացնում արաբական էքսպանսիայի տարածման սահմանները և կայսրության ռազմական հնարավորությունները: Բայց նա իր կողմնակիցների հետ պատերազմական գործողությունների և քաղաքական իրադարձությունների զարգացման ընթացքում մասնակցություն է ցուցնում հայ հաստատ համոզման, որ պատերազմներում ռազմական գերազանցությունը անվիճելիորեն խալիֆայի կողմն է և բյուզանդական տիրապետությունը Հայաստանում ապագա շունի: Կայսրությունը լքել էր իր արևելյան նահանգները, իսկ անպաշտպան նախարարները դիմադրում էին արաբներին, հույս ունենալով զինվորական օգնություն ստանալ Բյուզանդիայից: Բայց վերջինս, ընդհակառակը, ձգտում էր օգտվել հայերի ծանր դրությունից և միավորել եկեղեցիները⁸¹: Կայսրությունը պատերազմական դադարի պայմաններում հայերին նորից էր ենթարկում եկեղեցական հալածանքի՝ քաղկեդոնականություն պարտադրելով: Կ. Պոլսի արքեպիսկոպոս և մուսուլման հույն հոգևորականությունը դարձյալ կարծում էին, թե արաբական վտանգի պայմաններում հայերի քաղկեդոնականացումը կամրապնդի բյուզանդական ազդեցությունը և տիրապետությունը Հայաստանում: Այդ ժամանակ է, որ Ներսես կաթողիկոսը՝ քաղկեդոնականության և երկրում կայսրության տիրապետության կողմնակիցը, կառուցում է հոյակապ Զվարթնոց եկեղեցին, իր բնակությունը վայր դարձնելով նրան կից ապարանք:

Հայերի եկեղեցական նոր հալածանքի առիթը, պատմիչի տեղեկության համաձայն, հանդիսանում է հետևյալը. Հայաստանում տեղավորված կայսրության դորքը դժգոհում է հայերից, որ նրանք հրաժարվում են բյուզանդացիների հետ հաղորդվելուց. «Աս արք՝ զրեն նոքա ամբաստանութին առ թագաւորն Յունաց Կոստանդին և հայրապետն, թէ «իբրեւ զանաւրէնս համարեալ եմք յաշխարհիս յայսմիկ: Քանզի անարգանս համարին Քրիստոսի Աստուծոյ զժողովն Քաղկեդոնի և պտումարն Լևոնի, և նզովեն զնոսա»: Յայնժամ հրաման ետ թագաւորն հայրապետան հանդերձ, և գրեն հրովարտակ առ Հայս, զի միաբանութին հաւատոյ աբասցեն ընդ Հոռոմի, զի մի խոտեսցեն զժողովն և զտումարն զայնս»:

Կայսեր հրամանով Հայաստան է գալիս աստվածաբան Դավիթը, որը Բագրեանդ գավառի Բաղավան գյուղից էր և լավ հմտացել էր փիլիսոփայության արվեստի մեջ: Նա ունեւր կոնկրետ հանձնարարություն՝ «Զի երթեալ ի

⁸¹ В. Брюсов, «Летопись исторических судеб армянского народа», Ереван, 1940, էջ 58:

⁸² Սեբեոս, էջ 121, նաև Ասողիկ, էջ 91:

բաց հատցն Կհակառակութիւնն»⁸³, այսինքն՝ ստիպել հայերին քաղկեդոնականություն րնդունել:

Դվինում գումարված եկեղեցական ժողովը⁸⁴, որին մասնակցում են բոլոր եպիսկոպոսները, նախարարները, ներսես կաթողիկոսը և սպարապետ Թևդարոս Ռշտունին, րնթերցում է կայսեր հրովարտակը, պատրիարքի կոնդակը և ունկնդրում Դավթին, զոր ուսուցանէր ղերբորդութիւնն բաժանմամբ ըստ տումարին Լեոնի»⁸⁵: Ժողովի մասնակիցները միաձայն և վճռականորեն մերժում են քաղկեդոնականություն ընդունելու Կոստաս կայսեր առաջարկությունը, պատմիչի բառերով ասած, նրանք «չաւին յանձն փոխել զճշմարիտ վարդապետութիւնն սրբոյն Գրիգորի՝ ըստ տումարին Լեոնի»⁸⁶: Կազմւում են նրան ուղղված մի ընդարձակ պատասխան նամակ, որի տեքստն իր Պատմության մեջ ամբողջութեամբ մեջ է բերել Սեբեոսը⁸⁷: Այդ նամակում, ի միջի այլոց, ընդգծվում է այն հանգամանքը, որ իրենց՝ հայերի բրիստոնական դավանանքը ավելի հին է, քան հռոմեացիներին, որոնց մոտ այն պաշտօնապես սկըղընավորվում է Կոստանդին Մեծ կայսրից: «Արդ ունիմք մեք հաւատս ոչ ի նորագունից սահմանաւ, այլ որպէս ընկալաք մեք ի սուրբ առաքելոցն ի ձեռն հայրապետին մերոյ սրբոյն Գրիգորի, վարդապետելով զՏրդատ արքայ և զիշխանսն Հալոց աշխարհին, գոգցես եթէ և ամաւք յառաջ քան զԿոստանդիանոս:

83 Նույն տեղում:

84 Դվինում ժողովը, Կանոնագրքի տեղեկութեամբ, հրավիրվել է «յամի շորրորդի Կոստանդիանոսի կայսեր» («Գիրք կանոնաց և դատաստանի. վերստին զազափարեալ զգուշաւոր քաղդատութեամբ. զըջգիր թղթեայ», Կ. Պոլիս, 1831, էջ 135), այսինքն՝ 645 թ.: Սեբեոսը խոսնելով նույն կայսեր Հայաստան զաւու մասին (652 թ.), նշում է, որ ժողովը եղել է «յառաջ քան զայս շորս ամաքս» (էջ 145), այսինքն՝ 648 թ., իսկ ըստ Հովհաննես Գրասխանակերտցու՝ «երկու ամօք յառաջ» (էջ 87)՝ 650 թ.: Երկու տարրեր թվականները (645 և 648) վերաբերում են երկու տարրեր ժողովներին: Մ. Օրմանյանի կարծիքով, մեզ հետաքրքրողը գումարվել է 648 թ. («Աղղապատու», էջ 712, 717): Բյուզանդական եկեղեցու պատմության մեջ նշվել է նաև Դվինի 645 թ. եկեղեցաժողովը, որը նույնպես նդովել է Քաղկեդոնի որոշումը (տե՛ս Pargoire, նշվ. աշխ., էջ 183):

85 Ս ե բ ե ո ս, էջ 121:

86 Նույն տեղում:

87 Նույն տեղում, էջ 122—137: Սեբեոսի մոտ եղած այս դավանական թուղթը, ակադ. Ստ. Սախխայանցի կարծիքով, վավերագրական գրվածք չէ, որովհետև այն ոչ միայն սաստիկ աղավաղված է բառերի կողմից, այլև աչքի է ընկնում ամբողջ հատվածների կրկնությամբ, ետ և առաջ դասավորությամբ, փաստերի անճշտությամբ: Հայ աշխարհիկ և եկեղեցական բարձր խավի կողմից կայսրին առաքվող դրությունը չէր կարող այդքան անփույթ կերպով կազմվել: Ուստի, անվանի հայագետի ենթադրությամբ, այդ թուղթը եղել է «մի նախագիծ սևագրի», որը վերջնական խմբագրման չի ենթարկվել և լինելով անվավերական գրություն չի գետեղվել «Գիրք թղթութեց պաշտոնական ժողովածուի մեջ: Բայց Սեբեոսը հարկ է համարել այն գնել իր Պատմության մեջ անկատար և պակասավոր ձևով (տե՛ս Ս ե բ ե ո ս, էջ 191—192, ծանոթ. 64): Որ դավանական թուղթը չի ուղարկվել Կ. Պոլիս, երևում է նրանից, որ երբ ավելի ուշ Կոստաս II կայսրը գալիս է Դվին, մի հայ եպիսկոպոս նրա հետ տեղի ունեցած գրույցի ժամանակ ակնարկում է այդ թուղթը, կայսրին ասելով. «Եւ գիրն այն այժմ առ դմա է. հրամայեցէք խնդրել և տեսանել» (Ս ե բ ե ո ս, էջ 145): Սեբեոսը մասնակցել է Դվինի ժողովին, և ինչպես կարծում են, ինքն էլ դրել է նամակը, որին այդ պատճառով մեծ տեղ է տվել իր Պատմության մեջ (Մ. Օրմանյան, նշվ. աշխ., էջ 718—719): Այդ նամակը մեջբերված է նաև Ստ. Ասողիկի «Պատմութիւն Տիեզերականի» մեջ, էջ 91—98, բայց պակասավոր ու աղճատված ձևով: Այնուհետև, պատմիչը նախ խոսում է Կոստաս կայսեր Հայաստան զաւու, ներսես կաթողիկոսի հետ հաղորդվելու, ասալ նոր հավատի թուղթ գրելու մասին, մինչդեռ իրականում նամակը գրվել է կայսեր Հայաստան զաւուց շորս տարի առաջ (տե՛ս Ստ. Ասողիկ, էջ 353—354, ծանոթ. 80):

Նաև սուրբի՝ Դևոնդ մեծ աբրիպիսկոպոսն Կեսարու, ուր սնեալ և ուսեալ էր սուրբ Գրիգորիոս, որ և ձեռնադրեացն իսկ զնա ի քահանայապետութիւն, և նա զնոյն հաստատեաց զաւանդութիւն»⁸⁸։ Նամակում նշվում էր, որ հայերին կրոնափոխելու փորձեր շատ են կատարել պարսկական շար ու անօրեն արքաները⁸⁹։

Հայոց եկեղեցին հաստատուն և անսասան էր իր դավանանքին ու մերժում է քաղկեդոնականությունը։ Նման որոշման համար պայմանները միանգամայն նպաստավոր էին. կայսրությունը այդ ժամանակ գինվորական խռշուրտներ չունէր Հայաստանում։ Կայսեր նամակի քննարկման ընթացքում և նրան կտրուկ մերժողական պատասխան կաղմելիս, ժողովն ամբողջությամբ գտնվել է Թեոդորոս Ռշտունու ավագեցության տակ, բրի թելադրանքին, իրենց կամքին հակառակ, ենթարկվել են նաև Ներսես կաթողիկոսն ու նրա համախոհները։ Պատասխան նամակի առաքումը, մեզ համար անհայտ պատճառներով, հետաձգվել է և ի վերջո չի ուղարկվել Կոստաս II-ին, բայց, անկախ դրանից. Դավիթ Բագրատանցին՝ Կ. Պոլիս վերադառնալով, անշուշտ, ժողովի մասին հանգամանորեն տեղյակ է պահել կայսրին և պատրիարքին։

Արաբական արշավանքների ժամանակ, ինչպես իրավացիորեն ընդունում են, Հայաստանը զրեթե ձեականորեն էր գտնվում բյուզանդական իշխանության տակ, իրականում երկիրը կառավարում էր Թեոդորոս Ռշտունին, որը մինչև VII դ. 50-ական թթ. սկիզբը պաշարում էր արաբների դեմ, ձգտելով Հայաստանի անկախությունը⁹⁰, 648—652 թթ. ընթացքում հայերը աստիճանաբար հեռանում են Բյուզանդիայից և վերջնականապես խլում իրենց կապերը նրա հետ։ Չկարողանալով հասնել անկախության, նրանք, ի վերջո, հանգում են այն համոզման, որ ստեղծված բարդ քաղաքական իրադրության պայմաններում պետք է կողմնորոշվել երկու նվաճողների միջև, ընտրել, այսպես ասած, չափերից։ Փոքրագույնը։ Երկրի և ժողովրդի շահերի տեսակետից տվյալ պահին միանգամայն հեռատես և անիշտ քայլ էր երես դարձնել կայսրությունից և դաշինք կնքել Արաբական խալիֆայության հետ⁹¹։

Թեոդորոս Ռշտունին, խորհրդակցելով և համագործակցելով վրաստանի ու Աղվանքի ֆեոդալական ազնվականության հետ, բանակցություններ է վարում Ասորիքի արաբական կառավարիչ Մուավիայի հետ և 652 թ. պայմանագիր կնքում⁹²։

Հայ-արաբական դաշինքից մեծ վնաս էր կրում Բյուզանդիան, որի դեմ էր ուղղված այն։ Կայսրությունը, չկարողանալով հայերին դիվանագիտական միջոցներով իրեն ենթարկել, դիմում է ռազմական ուժի օգնությանը։ 652—653 թթ. Կոստաս կայսրը, պատմիչի ասելով, 100000-անոց բանակով արշավեց Հսլուստան, երկիրը իրեն ենթարկեց և հայ հոգևորականությանն ստիպեց ծառայելու քաղկեդոնականությանը սոսկ զենքի ուժով։ Սակայն Թեոդորոս Ռշտունին զգալի թվով հայ նախարարների պաշտպանությամբ և վրաց ու աղվանից համագործակցությամբ անհաշտ դիրք զրավեց Բյուզանդիայի հանդեպ։

⁸⁸ Սեբեոս. լջ 129։

⁸⁹ Նույն տեղում, լջ 122։

⁹⁰ Բ. Առաքելյան, նշվ. աշխ., լջ 71։

⁹¹ Ստ. Ասողիկ, լջ 89։

⁹² Սեբեոս. լջ 140—141։

Օսման խալիֆայի հրամանով Հարիր իրն Մասլամա զորավարը 654 թ. ներխուժեց Հայաստան: Հայ իշխանները դիմադրություն ցույց չտվեցին, իսկ բյուզանդական զորքը Մավրիանոսի հրամանատարության տակ պարտություն կրեց և փախավ: Երկիրը նվաճելուց հետո արաբները Ասորիք են տանում մեծ ավար և պատանդներ, որոնց միանում է նաև Թեոդորոս Ռշտունին: Հայ մեծ զորավարը և հայրենասերը մահանում է այնտեղ հավանաբար 656 թ. և բերվում թաղվում է հայրենի երկրում:

Այսպիսով VII դ. 40—50-ական թթ. Հայաստանը դառնում է արաբաբյուզանդական ռազմական ուժեղ բախումների ասպարեզ: Հայերը կենաց և մահու պայքար մղելով օտար զավթիչների դեմ, միաժամանակ ձգտում էին օգտվել նաև մրցակցությունից երկիրը ավերածությունից ու սրածությունից զերծ պահելու համար: Եւայց հայ ժողովուրդը չի կարողանում վերականգնել իր ազգային անկախ պետականությունը, որովհետև երկիրը, նրա զինվորական ուժերը մասնատված էին, չէին դադարում ֆեոդալական երկպառակությունները, իսկ նվաճող արաբական հորդանները անհամեմատ ուժեղ էին:

АРМЯНО-ВИЗАНТИЙСКИЕ ОТНОШЕНИЯ В VII В.—В ПЕРИОД ПЕРВЫХ АРАБСКИХ ПОХОДОВ

В. К. ИСКАНЯН

(Р е з ю м е)

Накануне арабских нашествий большинство армянских земель находилось в составе Византии. После договора Византии с Ираном в 628 г. правителем Византийской Армении был назначен Мжеж Гнуни — активный проводник церковной политики Византии.

Что же касается Персидской Армении, то положение там было столь тяжелым, что армянские нахарары предпочитали переселяться в византийскую часть Армении.

Начиная с 640 г. благодаря арабским походам в Армению ослабевает позиция Византии в Армении, хотя император Константин II пытается продолжить старую политику Византии, целью которой было заставить армян принять решения Халкедонского собора.

В этих сложных условиях ишхан Армении Теодорос Рштуни возглавляет борьбу армян не только против арабов, но и против Византии за достижение и упрочение самостоятельности Армении.